

摘藻堂四庫全書薈要

集部

欽定四庫全書薈要

集部

石湖詩集卷一
四

詳校官助教臣謝登



欽定四庫全書薈要卷

石湖詩集目錄

卷一

詩四十六首

卷二

詩五十四首

卷三

詩六十三首



卷四

詩六十七首

卷五

詩五十一首

卷六

詩四十三首

卷七

詩四十九首

卷八

詩五十二首

卷九

詩五十一首

卷十

詩五十九首

卷十一

詩六十五首

卷十二

詩七十二首

卷十三

詩四十四首

卷十四

詩五十四首

卷十五

詩六十九首

卷十六

詩六十五首

卷十七

詩六十九首

卷十八

詩六十首

卷十九

詩五十二首



卷二十

詩八十四首

卷二十一

詩六十首

卷二十二

詩四十二首

卷二十三

詩七十二首

卷二十四

詩七十首

卷二十五

詩六十三首

卷二十六

詩五十六首

卷二十七

詩七十九首

卷二十八

詩七十五首

卷二十九

詩五十首

卷三十

詩三十三首

卷三十一

詩五十一首

卷三十二

詩五十七首

卷三十三

詩三十九首

卷三十四

賦六首

楚辭四首

凡詩賦楚辭一千九百二十六首

臣等謹案石湖詩集三十四卷宋范成大撰
成大有吳郡志已別著錄案陳振孫書錄解
題成大有集一百三十六卷宋史藝文志亦
載石湖大全集一百三十六卷與陳氏著錄
同又石湖別集二十九卷又石湖居士文集
亡其卷數明代刻本僅一百三卷未詳其故
此本長洲顧嗣立等所訂乃於全書之中獨
摘其詩別行附賦楚辭一卷前有楊萬里陸

游二序然萬里所序者乃其全集不專序詩
游所序者乃其西征小集亦非序全詩以名
人之筆嗣立等姑取以弁首耳據萬里序集
乃成大所自編考十一卷末有自註云以下
十五首三十年前所作續得殘稿附此卷末
其餘諸詩亦皆註以下某處作今所傳者猶
自編之舊本矣詩不分體亦不分立名目惟
編年為次然送洪邁使金詩凡四首其兩首

在第八卷列於邁使還入境以詩迓之之前
其兩首乃列於第十卷何溥挽詞之後邁未
嘗再使金則送別之詩不應前後兩見又南
徐道中詩下註曰以下赴金陵漕試作則是
當在第二卷之首不應孤贅第一卷之末疑
後人亦有所竄亂割併故與宋本卷數不符
歟成大在南宋時與尤袤楊萬里陸游齊名
袤集久佚世所傳者僅尤侗所輯之一卷篇

什寥寥未足定其優劣今以楊陸二集相較其才調之健不及萬里而亦無萬里之粗豪氣象之濶不及游而亦無游之窠臼初年吟詠實沿溯中唐以下觀第三卷夜宴曲下註曰以下二首效李賀樂神曲下註曰以下四首效王建已明明言之其他如西江有單鵠行河豚嘆則雜長慶之體嘲里人新婚詩春晚三首隆師四圖諸作則全為晚唐五代之

音其門徑皆可覆按自官新安掾以後骨力
乃以漸而邁蓋追溯蘇黃遺法而約以婉峭
自為一家伯仲於楊陸之間固亦宜也乾隆
四十二年五月恭校上

總纂官臣紀昀陸錫熊臣孫士毅

總校官臣陸費墀

序

予疇昔之晨與客坐堂上遙見一健步黃衣負一笈至庭下呼而諏其奚自曰自參政公范氏也發其笈公之文集在焉索其書讀之則公之子莘叩頭請曰莘不天不自賈越而先公一夕奄忽棄其孤莘欲死而不敢者有先公付託之重任在方先公之疾而未病也日夜手編其詩文數年成集凡若干卷逮將易簀執莘手而授之且曰吾集不可以無序篇有序篇非序篇寧無序篇

也今四海文字之友惟江西楊誠齋與吾好且我知微
斯人疇可以屬斯事小子識之若莘則何敢請而先公
之治命不敢墜惟先生哀而諾之予執書抱遺編而泣
曰萬里與公同年進士也公先進至為朝廷大臣與天
子論道發政坐廟堂進退百官而萬里環堵荒寒之士
也何敢與公友公不我薄陋而辱友之萬里不敢拒公
亦不敢以執政俟公也今忍死丁寧之託其何敢辭初
公以文學材氣受知壽皇自致大用至杖漢節使強鄰

即其庭伏穹廬不肯起袖出私書切責之君臣大驚有
自階闥之嬖竊位樞臣者其勢方震赫公沮之竟不奉
詔而去其所立又有不凡者矣若夫劇心於山水風月
之場彫龍於言語文章之圃此吾輩羈窮酸寒無聊不
平之音也公何必能此哉古語曰爭名者必於朝爭利
者必於市是二人者使之以此易彼或以彼易此二人
者其肯乎哉非不肯也不願也非不願也亦各樂其樂
也詩人文士挾其所樂足以敵王公大人之所樂不啻

也猶將愈之故王公大人無以傲夫士而士亦無所折
於王公大人今公乃自屏其所可樂而復力爭夫士之
所甚樂所謂不虞君之涉吾地者其不多取乎然公之
詩文非能工也不能不工耳公風神英邁意氣傾倒拔
新領異之談登峰造極之理蕭然如晉宋間人物他人
戛戛吃吃而不能出諸口者公贖呻噫欠之間猝然談
笑而道之則其詩文之工豈十日一水五日一石之謂也
哉甚矣文之難也長於臺閣之體者或短於山林之味

諧於時世之嗜者或漓於古雅之風牋奏與記序異曲
五七與千百不同調非文之難兼之者難也至於公訓
誥具西漢之爾雅賦篇有杜牧之刻深騷詞得楚人之
之幽婉序山水則柳子厚傳任俠則太史遷至於詩大
篇決流短章斂芒縟而不釀縮而不儻清新嫵麗奄有
鮑謝奔逸雋偉窮追太白求其隻字之陳陳一倡之鳴
鳴而不可得也今海內詩人不過三四而公皆過之無
不及者予於詩豈敢以千里畏人者而於公獨斂衽焉

於是文士詩人之難者易偏者兼矣其不盛矣乎嘻人
琴今俱亡矣廣陵散今此聲遂絕矣惠子不生莊子不
死復何道哉公之別墅曰石湖山水之勝東南絕境也
壽皇嘗為書兩大字以揭之故號石湖居士云公諱成
大字致能世為姑蘇人其世次言行職官則有少保大
觀文大丞相益公周公之銘詩在紹熙五年六月十一
日誠齋野客楊萬里謹序

序

石湖居士范公待制敷文閣來帥成都無制置成都潼
川利夔四道成都地大人衆事已十倍他鎮而四道大
抵皆帶蠻夷且北控秦隴所以臨制捍防一失其宜皆
足致變故於呼吸顧盼之間以是幕府率窮日夜力理
文書應期會而故時巨公大人亦或不得少休及公之
至也定規模信命令施利惠農選將治兵未數月聲震
四境歲復大登幕府益無事公時從其屬及四方之賓

客飲酒賦詩公素以詩名一代故落紙墨未及燥士女
萬人已更傳誦被之樂府弦歌或題寫素屏團扇更相
贈遺蓋自蜀置帥守以來未有也或曰公之自桂林入
蜀也舟車鞍馬之間有詩百餘篇號西征小集尤雋偉
蜀人未有見者盍請於公以傳屢請而公不可彌年乃
僅得之於是相與刻之而屬游為序淳熙三年上巳日
朝奉郎成都府路安撫司參議官兼四川制置使司參
議官山陰陸游序

宋史本傳

范成大字致能吳郡人紹興二十四年擢進士第授戶
曹監和劑局隆興元年遷正字累遷著作佐郎除吏部
郎官言者論其超躡罷奉祠起知處州陞對論力之所
及者三曰日力曰國力曰天力今盡以虛文耗之上嘉
納處民以爭役囂訟成大為勅義役隨家貧富輸金買
田助當役者甲乙論第至二十年民便之其後入奏言
及此詔頒其法於諸路處多山田梁天監中詹南二司

馬作通濟堰在松陽遂昌之間激漢水四十里溉田二十萬畝堰歲久壞成大訪故迹疊石築防置堤關四十所立水則上中下溉灌有序民食其利除禮部員外郎兼崇政殿說書乾道令以絹計賦估價輕而論罪重成大奏承平時絹匹不及千錢而估價過倍紹興初年遞增五分為錢三千足今絹實貴當倍時直上驚曰是陷民深文遂增為四千而刑輕矣隆興再講和失定受書之禮上嘗悔之遷成大起居郎假資政殿大學士充

金祈請國信使國書專求陵寢蓋泛使也上面諭受書
事成大乞并載書中不從金迓使者慕成大名至求巾
幘效之至燕山密章奏具言受書式懷之入初進國書
詞氣慷慨金君臣方傾聽成大忽奏曰兩朝既為叔姪
而受書禮未稱臣有疏措笏出之金主大駭曰此豈獻
書處耶左右以笏標起之成大屹不動必欲書達既而
歸館所金主遣伴使宣旨取奏成大之未起也金庭紛
然太子欲殺成大越王止之竟得全節而歸除中書令

人初上書崔寔政論賜輔臣成大奏曰御書政論意在飭紀綱振積敝而近日大理議刑遞加一等此非以嚴致平乃酷也上稱為知言張說除簽書樞密院事成大當制留詞頭七日不下又上䟽言之說命竟寢知靜江府廣西窘匱專藉鹽利漕臣盡取之於是屬邑有增價抑配之敝詔復行鈔鹽漕司拘鈔錢均給所部而錢不時至成大入境曰利害有大於此乎奏䟽謂能裁抑漕司強取之數以寬郡縣則科抑可禁止從之數年廣州

鹽商上書乞復令客販宰相可其說成大出銀錢助之
人多以為非下有司議卒不易成大說舊法馬以四尺
三寸為限詔加至四寸以上成大謂互市四十年不宜
驟改除敷文閣待制四川制置使疏言吐蕃青羌兩犯
黎州而努兒結蕃列等尤桀黠輕視中國臣當教閱將
兵外修堡砦仍講明教閱團結之法使人自為戰三者
非財不可上賜度牒錢四十萬緡成大謂西南諸邊黎
為要地增戰兵五千奏置都監路分吐蕃入寇之路十

有八悉築柵分戍兒結擾安靜若發飛山軍千人赴之料其三日必遁已而果然白水砦將王文才私娶蠻女常導之寇邊成大重賞檄羣蠻使相疑貳俄禽文才以獻即斬之蜀北邊舊有義士三萬本民兵也監司郡守雜役之都統司又俾與大軍更戍成大力具其不可詔遵舊法蜀知名士孫松壽年六十餘樊漢廣甫五十九皆挂冠不仕表其節詔召之皆不起蜀士由是歸心凡人才可用者悉致幕下用所長不拘小節其傑然者

露章薦之往往顯於朝位至二府召對除權吏部尚書
拜參知政事兩月為言者所論奉祠起知明州奏罷海
物之獻除端明殿學士尋帥金陵會歲旱奏移軍儲米
二十萬賑飢民減租米五萬水賊徐五竊發號靜江大
將軍捕而戮之以病請閒進資政殿學士再領洞霄宮
紹熙二年加大學士四年薨成大素有文名尤工於詩
上嘗命陳俊卿擇文士掌內制俊卿以成大及張震對
自號石湖有石湖集攬轡錄桂海虞衡集行於世

欽定四庫全書薈要卷卷一萬五千四百七

集部

石湖詩集卷一

宋 范成大 撰

行路難

贈君以丹棘忘憂之草青棠合歡之花馬腦遊仙之夢
枕龍綵辟寒之寶紗天河未翻月未落夜長如年引春
酌昔人安在空城郭今夕不飲何時樂

西江有單鵠行

西江有單鵠託身萬里雲根為稻梁謀墮此鷗鷺羣朝
遊楓葉抄暮宿蘆花根懷安浦淑暖忘記雲海寬忽有
孤征鴻驚飛落江濱眼明見黃鵠解后傾情真羽毛雖
不同意氣頗相親言鵠有六翮何不高飛翔水鳥不足
羣朝暮徒嘲喧相將乘風去一上盤秋旻渴飲顙露滋
飢吸晴霞暎方知翅翎俊可以凌埃塵東風昨解凍春
光暖如薰陽鳥當北鄉行止倏已分儻欲相逐去關山
隔吳秦兩鳥竟分飛鳴聲動行人豈不有歲晚鴻當復

來賓但愁山海闊歧路多糾紛復來失故道那得相知
聞鴻歸有儔侶鵲住長悲辛

車遥遥篇

車遥遥馬憧憧君遊東山東復東安得奮飛逐西風願
我如星君如月夜夜流光相皎潔月暫晦星常明留明
待月復三五共盈盈

放魚行

水落塘枯魚卧陸小兒抱取不濡足昂藏赤鯁亦垂頭

背負玄鱗三十六家人滌砧不辭勞云有素書金錯刀
嗟予贖放豈徵福忍把汝命供吾饗如今已脫張胡子
好上龍門飲湖水不然崛起載飛仙切莫顛狂稱長史
晚步東郊

水墨依林寺青黃負郭田斜陽猶滿地片月早中天策
策鴉飛急冥冥樹影圓西山元自好那更著雲煙

元夜憶羣從

愁裏仍蒿徑閒中更草門青燈聊自照濁酒為誰溫隙

月知無夢窓梅寄斷魂遙憐好兄弟飄泊兩江村

登西樓

少年豪氣合摧鋒青鬢朱顏萬事慵疇昔四愁無夢到
及時一笑有誰供詩情飲興如雲薄草色花光似酒醲
千里春心吟不盡下樓分付晚煙鐘

不寐

南風釀卑濕滑滑病履舄竟日隱几坐拳局不得適丹
田恍瀕洞銀海眩眊黑髀弱類跨鞍臂強如運甕合體

競酸嘶莫夜輒增極奏牀不得眠耿耿到明發黃妳共
住以來夢乃其職睡魔吾故人曩是不速客招呼各偃
蹇莫効尺寸力周公無由來咫尺今古隔彭尸不得去
置騎無行色主客兩愁緒虛室浪生白人言老禪師兩
脇不到席茲事恐未暇但願了今夕平生北窓眠栩栩
即聖域睡僊吾所慕行步亦斂息

河豚歎

鰕生藜莧腸食事一飽足腥腐色所難況乃衷醢毒彭

亨強名魚殺氣孕慘黷既非養生具宜謝砧儿酷吳儂
真差事網索不遺育捐生決下箸縮手汙童僕朝來里
中子饒吻不待熟濃睡喚不應已落新鬼錄百年三寸
咽水陸富有藪一物不登俎未負將軍腹為口忘計身
饕死何足哭作俑者誰與至今走末俗或云先王意除
惡如菽菽逆梟與毒獍歲歲參幣玉芟夷入薦羞蓋欲
殲種族生死有定數斷命烏可續適丁是時者未易一
理局龜鼎子公怒羊羹華元劓異味古所珍無事苦畏

縮駢頭
訐此語戒諭祇取瀆聾
盲死不悟明知諒已燭
續長恨歌七首

金杯潋灩曉粧寒
國色天香勝牡丹
白鳳詔書來已暮
六宮鉛粉半春闌

紫薇金屋閉春陽
石竹山花却自芳
莫道故情無覓處
領巾猶有隔生香

聞道蓬壺重見時
瘦來全不耐風吹
無端却作塵間念
已被仙宮聖得知

別後相思夢亦難
東虛雲路海漫漫
仙凡頓隔銀屏影
不似當時取次看

人似飛花去不歸
蘭昌宮殿幾斜暉
百年只有雲容姊
留得當時舊舞衣

驪山六十二高樓
突兀華清最上頭
玉羽川長湘浦暗
三郎無事更神遊

帝鄉雲馭若為留
八景三清好在不
玉笛不隨雙鶴去
人間猶得聽梁州

雷雨鄰舍起龍

雨工避事欲蟠泥
帝遣豐隆執以歸
連鼓一聲人失箸
不知挂壁幾梭飛

次韻唐致遠雨後喜涼

老陽作氣再三衰
鼓竭之餘不支雨
牽旗拔幟掃迹空
一點新涼破殘暑
飛蚊薨薨已無奇
蜻蜓翅淨摩天嬉
竹窓日暮轉蕭瑟
喜有促織鳴聲悲

秋日二絕

碧蘆青柳不宜霜染作滄洲一帶黃
莫把江南誇北客
冷雲寒水更荒涼

新秋病骨頓成衰不度溪橋半月來
無事閉門非左計
饒渠屐齒上青苔

窓前木芙蓉

辛苦孤花破小寒
花心應似客心酸
更憑青女留連得
未作愁紅怨綠看

嘲里人新婚

冷艷潁容一笑開休將鸞扇更徘徊
瑩篴細寫歸舟字彷彿遊仙夢裏來

過松江

長虹斗起蛟龍穴朱碧欄干夜明滅
太湖三萬六千頃多少清風與明月
青鷁驚飛白鷺閒丹楓未老黃蘆折
誰將橫笛叫蒼煙無限驚波翻白雪
洞庭林屋舊遊處玉柱金庭路巉絕
水仙逢迎慘脩袂問我歸計何當決
去年匹馬兀春寒今此孤篷窘秋熱
人生意氣得失間

輕重劒頭吹一呖莫將塵土浣朱顏却待丹砂回白髮
過平望

寸碧闊高浪孤墟明夕陽水柳搖病綠霜蒲蘆新黃孤
嶼乍舉網蒼煙忽鳴榔波明荇葉顫風熟蘋花香雞犬
各村落蓴鱸近江鄉野寺對客起樓陰濯滄浪古來離
別地清詩斷人腸亭前舊時水還照兩鴛鴦

長安閘

斗門貯淨練懸板淙驚雷黃沙古岸轉白屋飛檐開是

間哀文許舳艫蔽川來千車擁孤隧萬馬盤一坏篙尾
亂若雨檣竿束如堆摧摧勢排軋洶洶聲喧阗偪仄復
偪仄誰肯少徘徊傳呼津吏至樊蓋凌高埃囁嚅議譏
征呌怒不可裁吾觀舟中子一一皆可哀大為聲利驅
小者飢寒催古今共來往所得隨飛灰我乃羈旅人胡
為乎來哉

榮木

并序

卧病十日綠陰滿庭因誦淵明榮木詩其序曰日月

推遷已復有夏總角聞道白首無成犁然有感乃和其韻

薰風南來木榮於茲木榮幾時黃落從之逝其須臾坐
成四時今我不學殆其已而天旋地遊日月其根形息
氣徂不亡者存去鄉離家莫肯過門猗歟先師不我疵
陋褰衣示珠俾我復舊自我來歸十年不富孰蠹孰蠹
惟汝自疚冉冉榮木霜華將墜天黑路長屹蹶可畏隸
也不力奚取六驥脂車着鞭一息而至

兩木

并序

壬申五月卧病北窓惟庭柯相對手植綠橘枇杷森然出屋枇杷已著子橘獨十年不花各賦一詩

枇杷昔所嗜不問甘與酸黃泥裹餘核散擲籬落間春風拆勾萌樸檉如榛管一株獨成長蒼然齊屋山去年小試花瓏瓏犯冰寒化成黃金彈同登桃李盤大鈞播羣物斡旋不作難樹老人何堪挽鏡覓朱顏頷髭爾許長大笑歌巾冠

綠橘生西山得自髯翁家云此接活根是歲當著花俛
仰乃十霜垂蠹紛相遮芳意竟寂寞枯枝謾槎牙風土
諒非宜翁言豈予夸會令返故山高深謝汙邪石液滋
舊根山英擢新葩黃團挂霜實大如崆峒瓜當有四老
人來駐七香車

道中

月冷吟蛩草湖平宿鷺沙客愁無錦字鄉信有燈花蹤
跡隨風葉程途犯斗槎君看枝上鵲薄暮亦還家

落鴻

落鴻聲裏怨關山淚濕秋衣不肯乾只道一番新雨過
誰知雙袖倚樓寒

題山水橫看二首

煙山漠漠水漫漫老柳知秋渡口寒盡是西溪腸斷處
憑君將與故人看

霜入丹楓白葦林橫煙平遠暮江深君看鴈落帆飛處
知我秋風故國心

瑞香花

萬粒叢芳破雪殘
曲房深院閉春寒
紫紫青青雲錦被
百疊薰籠晚不翻
酒惡休拈花藥嗅
花氣醉人醺勝酒
大將香供惱幽禪
恰在蘭枯梅落後

讀史

登壇策劉項
卧廬料曹孫
探懷取事業
一一如印圈
英豪蓋天資
八極入控搏
由來事成毀
只繫手覆翻
玉虹朝貫日
劍氣夜燭天
雖欲避功名
何處蟄龍鸞
我生後

千載愚暗難具言長大但食粟閔凶不能文麥豆已難
辨捐稅固不分抱瓮灌圃畦截竿避城門智畧類如此
何以超籬籓龜剝始神筴木斷方犧尊朝市有機穽冠
裳或鉗髡茲事定不闕吾其老泥蟠敢云善用短聊復
強自寬

浙江小礪春日

客裏無人共一杯故園桃李為誰開春潮不管天涯恨
更捲西興暮雨來

代聖集贈別

一曲悲歌水倒流
尊前何計緩千憂
事如夢斷無尋處
人似春歸挽不留
草色粘天鷓鴣恨
雨聲連曉鷓鴣愁
迢迢綠浦帆飛遠
今夜新晴獨倚樓

二月三日登樓有懷金陵宣城諸友

百尺西樓十二欄
日遲花影對人閒
春風已入片時夢
寒食從今數日間
折柳故情多望斷
落梅新曲與愁關
詩成欲訪江南便
千里煙波萬疊山

寒食郊行書事二首

野店垂楊步荒祠苦竹叢鷺窺蘆箔水烏啄紙錢風媪
引濃粧女兒扶爛醉翁深村時節好應為去年豐
隴麥欣欣綠山桃寂寂紅帆邊漁絕浪木末酒旗風信
步隨芳草迷途問小童賞心添脚力呼渡過溪東

初夏二首

清晨出郭更登臺不見餘春只麼回桑葉露枝蠶向老
菜花成莢蝶猶來

晴絲千尺挽韶光
百舌無聲燕子忙
永日屋頭槐影暗
微風扇裏麥花香

夏夜

脉脉惜佳夜
泠泠成浩歌
儻無詩句子
將奈月明何
露氣濛花重
風聲入樹多
清歡殊未辨
桂影墮江波

與時叙現老納涼池上時叙誦新詞甚工

會心不在遠
頃步便得之
長風吹月來
清影落半池
屋頭見木葉
玲瓏剪琉璃
紅塵絆兩足
大笑兒輩癡
老禪

挽我遊高論方軒眉潘郎忽鼎來談詩解人頤晚誦雲
髻篇濯濯餘春姿想見篇中人清潤如君詩笑我兩枯
木獨與三冬期

林元復輓詩

胸次崢嶸滿貯書十年名字滿江湖張公閱世詩千首
揚子傳家宅一區謾道春風須得意那知秋雨不成珠
自從雪魄冰魂散魯國今誰更服儒

戲贈少梁

屈膝銅鋪畫掩闌薰爐誰伴夕香寒秋來合有相思字
會待風前片葉看

南徐道中

以下赴金陵潛試作

生憎行路與心違又逐孤帆擘浪飛吳岫湧雲穿望眼
楚江浮月冷征衣長歌悲似垂垂淚短夢紛如草草歸
若有一塵供閉戶肯將篋舫換柴扉

石湖詩集卷一

欽定四庫全書薈要卷卷一萬五千四百八

集部

石湖詩集卷二

宋 范成大 撰

望金陵行闕

聖代規模跨六朝行宮臺殿壓金鰲三山落日青鸞近
雙闕清風紫鳳高石虎蹲江蟠王氣玉麟湧地鎮神臯
太平不用千尋鎖靜聽西城打夜濤

金陵道中

山晚黃羊隨日下天寒白犢弄風歸
愁埃百轉西州路
笑憶沙湖一棹飛

曉行

官塘驛

篝燈驛吏喚人行寥落星河向五更
馬上誰驚千里夢
石頭岡下小車聲

秦淮

不將行李試問關誰信江湖道路難
腸斷秦淮三百曲
船頭終日見方山

重九獨登賞心亭

誰教佳節滯天涯
強展愁眉管物華
每歲有詩題白鴈
今年無酒對黃花
悠悠造化占斜日
草草登臨記落霞
宇宙此身元是客
不須彈鋏更思家

賞心亭再題

天險東南重兵雄
百二尊拂雲千雉
繞截水萬崖奔
赤日吳波動蒼煙
楚樹昏向無形勝
地何以控乾坤

宿義林院

冥氣昏如雨禪房冷似冰竹間東嶺月松杪上方燈驚
鵲盤金剝流螢拂玉繩明朝窮脚力連夜斬崖藤

荆公墓二首

百歲誰人巧拙一丘底處虧成半世青苗法意當年雪
竹詩情

本意治功徒木何心黨禍揚塵報讎豈教行劫作俑翻
成害仁

十月朔客建業不得與兄弟上冢之列悲感成詩

歲已看成暮身今未得歸風塵孤淚盡霜露寸心違南
碕新流水西山舊落暉煙松應好在宿草定成非逝水
方東去浮雲浪北飛危魂先自斷不待更沾衣

白鷺亭

倦遊客舍不勝閒日日清江見倚闌少待西風吹雨過
更從二水看淮山

臘脂井三首

昭光殿下起樓臺拚得山河付酒杯春色已從金井去

月華空上石頭來

午醉醒來一夢非
忽忽玉樹逐春歸
臘脂却作千年計
不似愁魂四散飛

腰支旅拒更神遊
桃葉山前水自流
三十六書都莫恨
煩將歌舞過揚州

秦淮

并序

自金陵復泛秦淮
宛轉數百曲
世傳始皇東巡
自江乘渡望氣者
以為金陵有天子氣
乃鑿長岡引潮水

入焉號曰秦淮逶迤屈曲不類人功故又傳為龍所
開也

祖龍驅羣龍疏此萬丈溝雨工戀故棲十步九回頭至
今秦淮曲蜿蜒若春蛇遊舟師厭回互歎息倚拖樓維昔
東巡初八極圍寸眸天端有佳氣鬱鬱東南浮卜云當
興王在後五百秋叱咤召六丁慘淡風雲愁鑿渠斷地
脉自謂神與謀乾坤有端倪已露不可收大帝開吳天
定鼎臨江陬融融秣陵日始照十二旂經營暨六代茲

地稱神州乃知歷數定昧者徒私憂茲事故老傳未知
信然不姑置勿重論作詩歎遲留

九月三日宿胥口始聞鴈

以下歸
崑山作

故人久不見乍見雜悲喜新鴈如故人一聲驚我起把
酒不能觴送目問行李曾雲行路難空濛千萬里塞北
多關山江南渺雲水風高吹汝瘦旅伴今餘幾斜行不
少駐滅沒蒼煙裏羈遊吾亦倦客程殊未已扁舟費年
華短纜繫沙尾物生各有役冥心聽行止江郊匝地熟

場圃平如砥歸期且勿念共飽豐年米

欲雪

烏鴉撩亂舞黃雲樓上飛花已唾人說與江梅須早計
馮夷無賴欲爭春

讀史三首

百歲虧成費械機烏鳶螻蟻竟同歸一檠燈火挑明滅
兩眼昏花管是非

堂堂列傳冠元功紙上浮雲萬事空我若材堪當世用

他年應只似諸公

鏤冰琢雪戰毛氂
畫餅聲名骨朽時
汗簡書青已兒戲
峴山辛苦更沉碑

宴坐菴四首

油燈已暗忽微明
石鼎將乾尚有聲
衲被蒙頭籠兩袖
藜牀無地著功名

五更風竹鬧軒窓
聽作江船浪隱牀
枕上翻身尋斷夢
故人待漏滿鞞霜

粥魚吼罷鼓逢逢卧聽飢鼃上曉缸一點斜光明紙帳
悟知檐雀已穿窓

跣趺合眼是無何靜裏惟聞鳥雀多俗客叩門稱問字
又煩居士起穿韉

青青礪上松送致遠入官

青青礪上松鬱鬱礪底柏松森上曾雲柏跼抱幽石偃
植雖不同臭味乃相得千霜與百雪偶立衆芳側衆芳
豈不好歲晏埽無迹廣厦罩羣木萬牛挽山澤松材可

世用攀援入王國草木豈有情亦復念離析君看此翠
柏錯莫無顏色孤陰愁月夜獨竊怨風夕蒼官何當歸
相望長相憶

除夜感懷

松楸百年哀霜露終歲悲天地豈汝偏鬼神諒無私孤
窮罪當爾我今怨尤誰噓絕夢自語伶俜影相隨豈無
一經傳政坐五鬼嗤鑿枘共齟齬榛荆費耘耔付畀踰
丘山奉承劣毫釐生男九族歡所願作門楣時命有大

謬生男竟何裨匏瓜謾枵腹蒲柳無真姿蹙縮高顴頰
蕭騷短髯髭貧病老歲月斗杓坐成移曉風淒以寒簾
幕相紛披月星炯我冠霧雨泣我衣煮蒿奉祠事苦淚
落酒卮逝者日已遠生者日以衰羸驂駕九折日暮抱
長飢岐路正巉絕耿耿誰當知

次韻唐子光席上賞梅

玉枝橫斜照清空纖手撚香

闕

公水部無人廣平去

後來我輩猶情鍾誰噴昭華送愁絕叫雲三弄怨斜月

徑須踏雪問前村莫待馬蹄如踣鐵
春風壓盡百花橋
尊前仍有董嬌嬈惜無楚客歌成雪
空有蕭郎眼似刀
夜行上沙見梅記東坡作詩招魂之句

玉妃謫人世乃在流水村天風吹嬋娟
飄墮寂莫濱芳
心怨命薄玉色淒路塵佳人來無期日暮多碧雲
溪聲
為咽絕月亦低微顰相逢倦遊子一笑不復珍脉脉問
不語亭亭意彌真要我冰雪句招此欲斷魂蘇仙上賓
天妙意終難陳璿柄忽傾墮曉嵐愁翠昏

次韻唐子光教授河豚

世間尤物美惡并江鄉未用誇吳羹清宮洞房寒熱媒
深山大澤龍蛇生胡夷信美胎殺氣不奈吳兒苦知味
楊花欲動荻芽肥汙手死心搖食指食魚要是佐黃粱
古來不必須河魴君看噉腹似渾脫寧肯滑甘隨芥蘆
先生法語峻立壁譏評不使一錢直膨亨從此迹如埽
坐令梅老詩無力懸知仙骨有青冥風香久已滌羶腥
大笑日華解毒法何如肘後餐霞經

題如夢堂壁

勃姑午啼喚雨鴨鳩曉轉留春片雲不載歸夢兩鬢全
供客塵

曉起

簾額繡波蕩漾燭盤紅淚闌干夢裏五更風急愁邊一
半春殘

再遊上方

僧共老花俱在客將春鴈同回范叔一寒如此劉郎前

度曾來

即事

醉袖籠鞭轉柳塘青門芳樹掩殘香誰驚翡翠雙飛去
祇有蓮花對斷腸

春晚即事

屋頭清樾暗荆扉紫萼甚爛斑翠英肥春晚軒窗人獨困
日長籬落燕雙飛

春晚三首

陰陰垂柳閉朱門一曲闌干一斷魂
手把青梅春已去滿城風雨怕黃昏

客去鉤窓詠小詩遊絲撩亂柳花稀
微風盡日吹芳草蝴蝶雙雙貼地飛

夕陽槐影上簾鉤一枕清風夢昔遊
夢見錢塘春盡處碧桃花謝水西流

樂先生闢新堂以待芍藥酴醾作詩奉贈

芍藥有國色酴醾乃天香二妙絕世立
百草為不芳先

生絕俗姿風味本無雙年來悟結習欲試安心方天魔
巧伺便作計迴剛腸多情開此花艷絕溫柔鄉道人為
一笑正爾未易忘呼童葺荷芷擇勝開軒窓啼鶯不愁
思遊蜂亦猖狂百年顰呻頃共此過隙光朝為春條綠
暮為秋葉黃把翫尚無幾況以憂愁妨願言秉燭遊迨
此春宵長

題城山晚對軒壁

一枕清風夢綠蘿人間隨處是南柯也知睡足當歸去

不奈溪山留客何

題城山挂月堂壁

百疊煙鬟照眼明
坐來心跡喜雙清
秋陽滿地西風起
猶有啼鶯四五聲

姑惡

并序

姑惡水禽以其聲得名世傳姑虐其婦婦死所化東坡詩云姑惡姑惡姑不惡妾命薄此句可以泣鬼余行茗雪始聞其聲晝夜哀厲不絕客有惡之以爲此

必子婦之不孝者予為作後姑惡詩

姑惡婦所云恐是婦偏辭姑言婦惡定有之婦言姑惡
未可知姑不惡婦不死與人作婦亦大難已死人言尚
如此

大暑舟行含山道中雨驟至霆奔龍挂可駭

隕雲暖前驅連鼓訏後殿駸駸失高丘擾擾暗古縣白
龍起幽蟄黑霧佐神變盆傾耳雙瞶斗暗目四眩帆重
腹逾飽櫓潤鳴更健圓漪暈雨點濺滴走波面伶俜愁

孤鴛颺閃亂飢燕麥老枕水卧秧穉與風戰牛蹊炭城
沉蟻隧洶瓴建水車競施行歲事敢休宴咿啞嘯簣鳴
輾輓連鎖轉駢頭立婦子列舍望宗伴東枯駭西潰寸
涸驚尺澱嗟余豈能賢與彼亦何辨扁舟風露熟半世
江湖徧不知憂稼穡但解加餐飯遙憐老農苦敢厭遊
子倦

題畫卷五首

鑿落秋江水石明高楓老柳兩灘橫君看疊巘雲容變

又有中宵雨意生

欹傾棧路繞山明
隔隴人家犬吠聲
無限白雲堆去路
不知誰識許宣平

春陰十日溪頭暗
夜半西風雨脚收
但覺奔霆吼空谷
遙知萬壑正爭流

暑雲潑墨送驚雷
坐見前山驟雨來
今夜一涼千萬里
更無焦卷與塵埃

秋晚黃蘆斷岸
江南野水連天
日色微明魚網
鴈行飛

入蒼煙

六月七日夜起坐殿廡取涼

畏暑中夜起出門月露清晶熒卧銀漢錯落低玉繩網
戶閉妙香石樓棲古燈風從何處來殿閣微涼生桂旗
儼不動藻井森上征榰榻共突兀鬼物相枝撐彭觥鐘
拄杖磔磔棲燕驚俗人豈解事鼻息春雷鳴大星送曉
來四窓炯微明顯氣凜肌骨栩栩兩腋輕乘風欲歸去
驂鸞耻青冥却恐方平知浪得狡獪名

中秋卧病呈同社

人間佳風月浩浩滿大千俗子不解愛我乃知其天以
此有盡姿翫彼無窮妍受用能幾何北溟一杯然天公
尚齟齬不肯畀其全卧病窘詩料坐貧羞酒錢瓊樓與
金闕想像屋角邊如聞真率社勝遊若登仙四者自難
并造物豈我偏

秋日雜興六首

我友蓬蒿士却埽謝四鄰內無三尺童外無雙蒲輪豈

非騏驥姿執轡難其人無衣可御冬忍寒待陽春仰雲
發永歎夜作寒螿呻參戶勸之起懷寶善自珍秋月耿
清夜秋風捲層雲佳哉為誰歎定為我與君莫嫌酒味
薄聊復相歡欣

夕陽下桑柘餘暉挂西山西山在何許冉冉紫翠間綠
雲無朝昏綠蘿竟暄寒昔與霞上人同跨雙飛翰上凌
紫霄峰下弄白石湍風吹墮渺莽及此行路難佳人應
望予我豈真忘還

秋高氣彌清歲晏天雨霜繁枝各病綠況乃枝上香向
來不勝春渺在無何鄉樂極定自悲誰歟此更張春秋
無終窮榮落殊未央

媽媽芙蓉花秀出清霜晨衆卉已昨夢孤芳若為新寒
蜂無僂飛一笑靜自珍誰令嬋娟姿墮此寂寞濱絕世
貴獨立後時莫酸辛回風佐小舞薄日生微醺即事亦
足樂何必桃李塵

言苟如言玉郎是問堅姿竭來西窓下死生寸于尼

緣有病葉土瘦無新枝太陽豈我偏檐影為蔽虧昔如
松柏獨今作蒲柳衰暮夜風雨急歲晏誰與歸

屋東雙梧桐婉婉無真姿朝為春風條暮為秋霜枝夜
久風葉鳴驚鵲一再飛梧桐不足愁會有明年期人老
真可歎寧復遊冶時

石湖詩集卷二

欽定四庫全書薈要卷一萬五千四百九

集部

石湖詩集卷三

宋 范成大 撰

擬古

彎環樓前月掩抑樓上人人月不得語相看兩凝顰西
窓回紋機織徧錦字春聊可自持翫何由將寄君

立春日郊行

子雁奚喬冬益皮上卜于處亦至秋菊墜次暗垂垂如

酤面初明淺淺波日滿縣前春市合潮平浦口暮帆多
春來不飲兼無句奈此金旂綵勝何

次韻漢卿舅即事二絕

風捲南枝一夜休孤芳寧肯為人留淡粧素服真成夢
落月橫參各自愁

萬木垂垂欲改柯根萌焦渴奈春何晚來礎汗南風壯
會有溪雲載雨過

晚潮

東風吹雨晚潮生
疊鼓催船鏡裏行
底事今年春漲小
去年曾與畫橋平

一篙

一篙新綠浦東西
雪絮漫江鴈不飛
宿雨纔晴風又轉
片帆那得及時歸

碧瓦

碧瓦樓前繡幙遮
赤欄橋外綠溪斜
無風楊柳漫天絮
不雨棠梨滿地花



題記事冊

庚午

劃破虛空一劍閒六根同轉上頭闌如今宴坐菴中事
政在凡夫道法間

暮春上塘道中

店舍無煙野水寒競船人醉鼓闌珊石門柳綠清明市
洞口桃紅上巳山飛絮著人春共老片雲將夢晚俱還
明朝遮日長安道慚愧江湖釣手閒

江上

天色無情淡江聲不斷流古人愁不盡留與後人愁

餘杭道中

落花流水淺深紅盡日帆飛繡浪中
柔眼迷離應欠雨
麥鬚騷殺已禁風
牛羊路杳千山合
雞犬村深一徑通
五柳能消多許地
客程何苦鎮怱怱

陳侍御園坐上

愁眼逢歡春水明
詩情得酒春雲生
花梢蝴蝶作團去
竹裏鶉鴝相對鳴
邂逅浮生此日好
纏綿俗累何時輕



擘牋沫墨之奇句擲笛當筵慚妙聲

獨遊虎跑泉小菴

苔徑彎環入茅齋取次成蔓花緣壁起閒草上堦生宿
雨松篁色新晴燕雀聲筒泉烹御米聊共老僧傾

王希武通判挽詞二首

當代名臣後惟公奕世賢及親三釜養遺子一經傳藥
石探奇字芸香緝斷編堂堂今不見塵迹自依然

事契從先世姻聯亦近親遽為重壤去淒斷十年鄰物

理真飄忽家聲正隱幃門闌可三戟何止駟車云

劇暑

赫赫炎官張傘輝輝赤帝騎龍安得雷轟九地會令雨
起千峰

次韻時叙

新春殘春一夢間夢中兀兀長閉關今朝出門春已去
但見新笋齊屋山作詩惜春聊復爾春亦何能與人事
閒心如絮久沾泥但愛日長添午睡

夜宴曲

以下共二
首效李賀

金鱗噴香煙龍蟠玉燈九枝青闌干明瓊映帶湘簾斑
風幃繡浪千飛鸞舞娥紫袖如弓彎雲中一笑天解顏
銜杯快卷玻璃乾花樓促箭春宵寒二十五聲宮點闌

神絃

雙娥一去三千秋粉篁春淚凝古愁神鼉悲鳴老龍怨
水為翻瀾雲為留素空逗露晚花泣神官行水鱗僮濕
潮聲不平江風急蒼梧冥茫九山立

樂神曲

以下共四
首效王建

豚蹄滿盤酒滿杯清風蕭蕭神欲來願神好來復好去
男兒拜迎女兒舞老翁翻香笺且言今年田家勝去年
去年解衣折租價今年有衣著祭社

繰絲行

小麥青青大麥黃原頭日出天色涼姑婦相呼有忙事
舍後煮繭門前香繰車嘈嘈似風雨繭厚絲長無斷縷
今年那暇織絹著明日西門賣絲去

田家留客行

行人莫笑田家小門戶雖低堪洒埽大兒繫驢桑樹邊
小兒拂席軟勝氈木臼新春雪花白急炊香飯來看客
好人入門百事宜今年不憂蠶麥遲

催租行

輸租得鈔官更催踉蹌里正敲門來手持文書雜嗔喜
我亦來營醉歸耳牀頭慳囊大如拳撲破正有三百錢
不堪與君成一醉聊復償君草鞋費

緘口翁

張達夫大卿酒尊名酒尊
不應緘口客令僕嘲之

君子取中道常在語默間多言固自費不語良獨難此
翁身如鄭文淵辨如懸河思如泉通來緘口欲挂壁囁
嚅畏客翻可憐君不見東家玉壺本弟兄叩之猶解語
分明願聞胚渾甚深義定自能令一座傾

春思

沙際綠蘋滿樓頭芳樹多光風入網戶羅幙生綠波前
年花開憶湘水今年花開淚如洗園樹傷心三見花依

舊銀屏夢千里

次韻漢卿舅臘梅二首

垂垂瘦萼泣微霜
剪剪纖英鎖暗香
金雀釵頭金蛺蝶
春風傳得舊宮粧

湘袂朝天紫錦裳
光風微度絳霄香
壽陽信美無仙骨
空把心情學澹粧

宿東寺二首

淡天如水霧如塵
殘雪和霜凍瓦鱗
纖女無言千古恨

素娥有意十分春

一聲黃鵠夜深歸
栖雀驚鳴觸殿扉
北斗半垂樓閣外
風旛渾欲上雲飛

範老前歲相別約歸
括蒼便游四明
今不知何地
暇日有懷

春色重來意未闌
故人一去肯復還
括蒼洞天掃舊隱
補陀海岸尋神山
杖屨雲煙遠遊樂
衣裳風雪行路難
鴻飛冥冥鷗浩蕩
安得置之雞鶩間

癸亥日泊舟吳會亭

去年春盤浙江驛湛湛清波動浮石今年春盤吳會亭
冥冥細雨濕高城天邊作客風沙裏今年去年成老矣
客心古井冷無波過眼人情亦如水憶昔三生住翠微
偶來平地著征衣山中故人應大笑扁舟坐穩何當歸
時叙火後意不釋然作詩解之

潘郎曉氣夢蘧蘧舞馬竟與融風俱前驅炎官後熱屬

席捲不貸淵明廬

淵明有
火後詩

君家十年四立壁震風凌雨

啼妻孥平生白眼蓋九州
閉戶不納結駟車清貧往往
被鬼笑付與一炬相揶揄
井堊木刊烏鼠赭汝則暫戲
吾何辜天闕悠悠虎豹怒叱
閤上訴非良圖作詩聊復
相料理甌墮已破空踟躕
浮生適來且適去況此茅屋
三間餘埽除劫灰得空濶
新月恰上東牆隅幕天席地
正可樂為君鼓旗助歌呼

題湯致遠運使所藏隆師四圖

欠伸

春風吹夢驀江飛行盡江南只片時深院無人自驚覺
夕陽芳樹乳鴉啼背立粧臺髻鬟懶鏡鸞應見茸茸眼
不須回首更嫣然劉郎已自無腸斷

倦繡

獨兒弄煖綠苔走花氣薰人濃似酒困來如醉復如愁
不管低鬟燕釵溜無端心緒向天涯想見檣竿旂脚斜
槐陰忽到簾旌上遲却尋常一線花

倚竹

輕薄人情翻覆手冰容却耐幽居久關中舊事逐春休
付與新人莫回首目送斜陽忘却歸竹風搖曳翠羅衣
君看脉脉無言處中有杜陵飢客詩

嗅梅

雪意勒花愁未解背陰一朶寒先退東風還是去年香
不比人心容易改宿酒膏騰正耐春花枝人面兩時新
相看好作風流伴只恐花枝却妒人

晚步

排門簾幕夜香飄燈火人聲小市橋滿縣月明春意好
旗亭吹笛近元宵

題開元天寶遺事四首

御前羯鼓透春空笑覺花奴手未工一曲打開紅杏藥
須知天子是天公

謝蠻舞袖貴妃絃秦國如花虢國妍不賞纏頭三百萬
阿姨何處費金錢

朝天車馬詔頻催劇得新湯未敢開忽報豬龍掀宇宙

阿瞞虛讀相書來

剥啄延秋屋上烏
明朝箭道入東都
宮中亦有風流陣
不及漁陽突騎粗

讀甘露遺事二首

神理人情本不同
絕憐鼠輩倖元功
天公盍假毛鷲助
成敗都懸反掌中

上林輦路草青青
誰向憑高識聖情
謾展東封圖畫看
不如醲酒亂平生

半塘

以下二十首
城西道中

柳暗閭門逗曉開
半塘塘下越溪回
炊煙擁棹船船過
芳草緣堤步步來

楓橋

朱門白壁枕彎流
桃李無言滿屋頭
牆上浮圖路傍堠
送人南北管離愁

橫塘

南浦春來綠一川
石橋朱塔兩依然
年年送客橫塘路

細雨垂楊繫畫船

胥口

扁舟拍浪信西東
何處孤帆萬里風
一雨快晴雲放樹
兩山中斷水粘空

香山

吳王種
香處

採香徑裏木蘭舟
嚼蘂吹芳爛熳遊
落日青山都好
在桑間蕎麥滿芳洲

上沙

水邊犬吠隔疎林
籬落蕭森日半陰
繁杏鎖紅春意淺
晚梅飄粉暮寒深

天平寺

以下天平山

舊遊彷彿記三年
轟飲題詩夜滿山
山上白雲應解笑
又將塵土浣朱顏

三年前至先兄與余同唐少梁登山絕頂比歸連路捫蘿而下夜已半主

僧散遣羣童秉炬求余三人久而莫得以為已仙也是夜宿寺中聯句達曉東坡曰自從有此山白石封蒼苔何嘗有此樂將去復徘徊至今徃來於余心

白雲泉

泉色正白蓋乳泉

龍頭高啄嗽飛流玉醴甘渾乳氣浮捫腹煮泉烹鬪勝
真成騎鶴上揚州

山頂

翠屏無路強攀緣我與枯藤各半仙不敢高聲天闕近
人間漠漠但寒煙

山徑

以下高
景山

雲根新徑絡山腰暗綠交陰宿露飄行到竹深啼鳥鬧
鵲鳩老怨畫眉嬌

泉亭

收拾風煙鎖翠微
亂山窮處結巖扉
青天不盡鳥飛盡
吳楚川原似衲衣

金氏菴

菴廢無人居

醉墨題窓側暮鴉蔓
藤綠壁走青蛇
春深有燕捎飛蝶
日暮無人埽落花

平雲閣

以下南峰

背倚天峰湧化宮
橫空閣道拖雙虹
火雲六月應奇絕

青瑣玲瓏八面風

鐵錫

支道林遺物

八環流韻寶枝鳴古鐵無花紫翠明
莫遣閒人容易振
泉飛石落鬼竄驚

放鶴亭

亦道林故事

石門關外古亭基
樹老藤枯野徑微
放鶴道人今不見
故應人與鶴俱飛

馬跡石

傳云道林騎白馬升天遺跡今石上雙跡儼然類蹄迹者後人為小塔識其處

跨馬凌空亦快哉
龍腰鶴背謾徘徊
遊人欲識仙蹤處
但覓蒼崖白塔來

金沙

沙中熱金燦然人或煉取多不成

莊嚴福地守靈仙
不為人間計子錢
一掬爛熳光照眼
路傍饒隸枉流涎

龍母廟

以下澄照寺

孝龍分職隸湘西
天許寧親歲一歸
風電春春損桃李
山中寒食尚冬衣

白蓮堂

古木參天護碧池
青錢弱葉戰連漪
忽忽遊子忽忽去
不見風清月冷時

白善坑

鑿山成井深數十丈復轉為
隧道以取之危險不可逼視

銀鬚玉璞紫金精
犯難窮探亦有名
白堊區區土同價
吳儂無事亦輕生

石湖詩集卷三

欽定四庫全書薈要卷一萬五千四百十

集部

石湖詩集卷四

宋 范成大 撰

賀樂丈先生南郭新居

新堂燕雀喜竹籬挂藤蘿
崩奔風濤裏得此巢龜荷
西山效爽氣南浦供清波
會心不在遠容膝何須多
先生淮海俊踏地嘗兵戈
飄飄萬里道芒屨厭關河
風吹落
下邑楚語成吳歌
豈不有故國荒垣鞠秋莎
無庸說當

歸到處皆南柯卜遷不我遐一水明青羅閉戶長獨往
奈客剥啄何會令蒼苔石屐齒如蜂窠

歲旱邑人禱第五羅漢得雨樂先生有詩次韻

海山之湫龍所宮濺瀑下赴聲淙淙碧壚大士何許主
愛此匹練飛冥濛偶然宴坐百年劫神力悲願俱無窮
向來火雲挾日走沙煎日爛千山童陸渾風高煽熱屬
涇川草肥間雨工萬口磬磬叫此士爐燎未吐誠先通
暮塵捲地羊角暗朝霞橫天魚尾紅商羊摩霄鳶起舞

居然一澗歌年豐人言佛陀入三昧斷取世界如旋蓬
指麾釋梵駿奔走況爾風伯并雷公風騷老將亦贊喜
筆陣獨埽詩壇空嗟余嘯咏不釋手一曲何啻歌三終
次韻時叙賦樂先生新居

愚士繁俗如囚奴至人遺形與化俱紛紜覺夢不可辨
遽遽栩栩知誰歟百年如泡亦如電剛欲鑄鐵充門樞
列仙之臞墮山澤一席三椽良有餘平生欽噉百戰勇
頓挫久已歸夷途光芒無用入詩句青天白日轟雷車

松煤繭紙妙揮埽芸香錦囊深貯儲紫露雙瓶春夜醉
黃雲一稜秋田租誰能搏扶北溟海政爾歸卧南陽廬
鴻飛冥冥隔雲雨弋人可慕不可呼

病中夜坐呈致遠

似霧如煙夜氣浮鶴鳴驚睡起搔頭含風竹影淡留月
著雨蛩聲深怨秋萬事心空癡已慣百骸歲晚病相投
便當採藥西山去脚力蹣跚怕遠游

戲題藥裏

捲却絲綸颺却竿莫隨魚鼈弄腥涎須知別有垂釣處
枯海無風浪拍天

夜歸

竹輿伊軋走長街掠面風清醉夢迴曲巷無聲門戶閉
一燈猶照酒壚開

田舍

呼喚攜鋤至安排築圃忙兒童眠落葉烏雀噪斜陽煙
火村聲遠林菁野氣香樂哉今歲事天末稻雲黃

戲題致遠書房

照叢菊壓萬黃金
欹架薇條半綠陰
逋客已隨丹鳳詔
但餘花草怨秋深

烏戍密印寺

烏戍即今之烏鎮
青堆今曰青鎮

青堆溪上水平堤

烏堆東岸
謂之青堆

絳瓦參差半掩扉

殿用純
紅瓦色

爛然

我與聖公俱客寓

聖翁本汀州白衣巖主號定光佛
者連南夫知州戴神像歸寄於寺

之藏前香
火蕭然

人傳帝子尚靈威

寺有昭明
太子祠

勝緣齟齬三重

障

東佛閣三造不成今
見材取次成之猶殊勝

志士辛勤十載歸

鍾樓乃一
僧發心束

髮為商文川廣得錢二萬緡
凡十年復髡而歸樓始成

花木禪房都不見但餘蝙蝠

畫羣飛

僧房皆為狹門深洞極
暗行百餘步不辨人

月夜泛舟新塘

溪上清風柳萬重綠煙無路月朦朧
船頭忽逐回塘轉

一水迢迢却向東

客舍

轂擊肩摩錦繡堆朝聲洶洶暮聲催
忽然憶起長橋路
天鏡無邊白鳥迴

病中夜坐

村巷秋春遠禪房夕磬深
飢蚊常繞髻暗鼠忽鳴琴
薄寒相中稜稜瘦不禁
時成洛下詠却似越人吟

秋芸有春綠

秋芸有春綠踈籬照孤芳
清霜早晚至何草能不黃
寧當念衰落政爾事容光
及時且自好來日殊未量

三湘怨

牙檣晝畫櫓搖漾
三湘浦佳人翔綠裾
含顰為誰舞拳

拳新荷葉愁絕煙水暮風雲忽飄蕩隱約聞簫鼓

夜發崑山

歲寒人謹戶霜重獨登舟弱櫓搖孤夢踈篷蓋百憂但
吟今不樂豈計幾宜休慚愧沙湖月年年照薄遊

十一月十二日枕上曉作

竹響風成陣窓明雪已花柴扉吟凍犬紙瓦啄飢鴉宿
酒欺寒力新詩管歲華日高猶擁被蓐食媿鄰家

南樓望雪

夜月流瑤圃春風滿玉都
籬疎先剝落樹密正模糊
亂點橫煙鴈驚啼失木烏
醉魂方浩蕩風袖不支梧

除夜書懷

運斗寅杓轉周天日御回
夜從冬後短春逐雨中來
鬢綠看看雪心丹念念灰
有懷憐斷鴈無思惜疎梅
絮厚眼生纈蔬寒腸轉雷
燭花紅瑣碎香霧碧徘徊
昨夢書三篋平生酒一杯
牀頭新曆日衣上舊塵埃
揺落何堪柳紛紜各夢槐
隙光能幾許世事劇悠哉
岐路東西變

羲娥日夜催頭顱元自覺懷抱故應開踴躍金何意青
黃木自灾身謀同斥鷃政爾願蒿萊

戲題澹菴小偈

莫問前程事漂然海上舟命乖逢鬼國緣合遇蓬丘畢
竟非身計俱成錯路頭故鄉隨脚是流浪不知休

偶書

出處由人不繫天癡兒富貴更求仙東家就食西家宿
世事何緣得兩全

題立雪圖

堂下心如鐵菴中語似雷有人參此語三箇一坑埋

題日記

誰言萬事轉頭空未轉頭時亦夢中若向夢中尋夢覺
覺來還入大槐宮

題張氏新亭

水楊成幄翠相遮猶有東風管歲華葉底青梅無數子
梢頭紅杏不多花煩將鍊火炊香飯更引長泉煮鬪茶

約我詩成須疥壁莫嗔歌側似歸鴉

玉臺體

捲幔燈千朶鉤簾月半弓
繡鴛翔瀝水金雀跂屏風
細意翩長袖多情結短封
銅壺從婉婉玉佩正丁東

枕上

明月無聲滿屋梁夢餘分影上人牀
素娥脉脉翻愁寂付與風鈴語夜長

斑駁

斑駁別後月纖纖門外疎桐影畫簾留下可憐將不去
西風吹上兩眉尖

題傳記二首

莫將綵筆寄朝雲紅淚羅巾隔路塵說與東風無限恨
倩風吹斷去年春

綵舟歸去海山青寂寞瑤臺月自明啼雨落花春已盡
夢魂何必更多情

病中絕句八首

空裏情知不著花
逢場將病當生涯
蒲團軟暖無時節
夜聽蚊雷曉聽鴉

溽暑薰天地湧泉
彎跼避濕挂行纏
出門斟酌無忙事
睡過黃梅細雨天

石鼎颼颼夜煮湯
亂拖芝朮闔溫涼
化兒幻我知何用
祇與人間試藥方

病中心境兩俱降
猶憶江湖白鳥雙
一夜雨聲鳴紙瓦
聽成飛雪打船窓

檐頭排溜密如簾溪上層陰定解嚴
最是看山奇絕處
白雲堆絮擁青尖

夜合梢頭蘸紫茸
菜葱頂上拆黃封
去年團扇題詩處
依舊踈簾細雨中

盆傾瓴建夜翻渠
繞屋蛙聲一倍粗
想見西堂渾不睡
明朝踏濕看菖蒲

謂現老

晴色先從喜鵲知
斜陽一抹照天西
竹雞何物能無賴
如許泥深更苦啼

病中三偈

擾擾隨流無定期波停浪息始應知
一塵不偶同歸處
四海無親獨步時苦相打通俱入妙
病緣纔識更何疑
霜清木落千山露笑殺東風葉滿枝

一交銷取萬黃金將病求醫枉用心
化盡此身成藥樹
不妨栽得病根深

莫把無言絕病根病根深處是無言
丈夫解却維摩縛
八字轟開不二門

雲間湖光亭

微風不動斂濤湍組練晶晶色界寒斜照發揮猶未盡
月明殘夜更來看

高景菴泉亭

峰頭揮手笑紅塵天入雙眸洗翳昏萬里西風熟秔稻
白雲堆裏著黃雲

晚入盤門

人語嘲喧晚吹涼萬窓燈火轉河塘兩行碧柳籠官渡

一簇紅樓壓女牆何處采菱聞度曲誰家拜月認飄香
輕裘駿馬慵穿市困倚蒲團入睡鄉

九月三十日夜出關候致遠不至

風勁便輕棹霜嚴怯敝裘青山蟠巨浸紅樹立滄洲月
黑鴈猶去燈寒人更愁煙松漫小峴何處問鳴騶

次韻致遠自毘陵見寄二首

黃鵠高飛碧落寒向來山水夢驚殘故情若問元真子
依舊江頭把釣竿

新詞一闕話羈愁清似寒泉咽隴頭官下有誰同此況
仲宣應是獨登樓

元日山寺

聽熟朝魚又暮鐘全將慵懶度三冬貪眠豹褥窓間日
怕擁馳裘陌上風登版自憐行蹭蹬讀碑仍怪視蒙籠
少年豪壯今如此畧與殘僧氣味同

題記事冊

北山山下小菴居佛劫仙塵只故吾八萬四千空色界

不離一法認毘盧

寄贈致遠并呈現老

草草家風節物新從來憂病不憂貧
琴書稍覺浮生誤香火惟知此事真
室裏空談思二士花間對影謾三人
祇愁盧李分攜後別有箜篌一曲春

春後微雪一宿而晴

綵勝金幡換物華垂垂天意晚平沙
東君未破含春藥青女先飛剪水花
夜夜逐回風鳴瓦墮曉成疎雨滴檐牙

朝暾不與同雲便烘作晴空萬縷霞

雪霽獨登南樓

雪晴風勁晚來冰樓上奇寒病骨驚雀啄空檐銀筍墮
鴉翻高樹玉塵傾青帘閃閃千家靜黃帽亭亭一水橫
坐久天容却溫麗一彎新月對長庚

次時叙韻送至先兄赴調

梅柳欲動風作難行人意在飛鴻間一官遠遊門戶弱
百歲上策身心閒胸次饒渠有廊廟夢魂叵使無江山

栽桃種杏須付我已辦鐵鎖遲公攀

上沙遇雨快涼

刮地風來健葛衣一涼便覺暑光低雲頭龍挂如垂筋
雨在中峰白塔西

自天平嶺過高景菴

卓筆峰前樹作團天平嶺上石成闕綠陰匝地無人過
落日秋蟬滿四山

高景山夜歸

伊軋籃輿草露間
夜涼月暗走孱顏
忽逢陂水明如鏡
照見沉沉倒影山

白雲嶺

路入千峰一線通
陸離長劍立天風
五年領客題詩處
正在孤雲亂石中

偃月泉

松風竹露午猶寒
知有龍蟠一掬慳
我欲今年來結夏
莫扃岫幌掩雲關

代人七月十四日生朝

秋入壺中玉宇鮮
芝蘭桃李共熙然
已饒瑞莢明朝滿
先借清蟾一夜圓
北闕紫泥應道路
東山紅袖莫雲煙
如今且醉江湖酒
來歲城南尺五天

題金牛洞

洞在宣城之成山前此燕廢無聞自魏公尚書發之常有笙簫仙音之瑞

故鄉江吳多好山
筍輿篾舫相窮年
春風吹入江南陌
疊障雙峰如舊識
聞道金牛更孱顏
古來鐵鎖高難攀
自從仙伯弭芝蓋
鳳舞鸞歌開洞天
新詩謄說山中妙

我不曾游先夢到從渠弱水隔蓬萊雲山何處無瑤草
曉自銀林至東灞登舟寄宣城親戚

曉山障望眼脉脉紫翠橫澄江已不見況乃江上城結
東治野裝木末浮三星羸馬隴頭嘶小車谷中鳴亭亭
東灞樹練練綠浦明篙師笑迎我新漲沒蘋汀徑投一
葉去雲水相與平聊將塵土面照此玻瓈清懷我二三
友高堂晨欲興風細桐葉墮露濃荷蓋傾凝香繞燕几
安知路傍情

讀唐太宗紀

平內
難

官府相圖勢不收國家何有各身謀縱無管蔡當時例
業已彎弓肯罷休

弟兄相賊數天倫自古無如舜苦辛掩井捐階危萬死
不聞親殺鼻亭神

佐命諸公趣夜衰爭言社稷要靈長就令昆季尸神器
未必唐家便破亡

建成回馬欲馳歸元吉行趨武德闈若使兩人俱得去

却於何處極兵威

嫡長承祧有大倫老公愛子本平均只知世上尋常理
爭信英雄解滅親

重讀唐太宗紀

立晉王

父子情深苦亦深蓋天神武一沾襟想當拔刃投牀際
也憶海池舟裏心

承乾謀父保天年青雀圖兄亦兩全隱刺諸兒却孥戮
一私知隔幾山淵

更張聊欲亢吾宗仁孝承家合至公
天發殺機那可料
正投阿武禍胎中

石湖詩集卷四

謹案卷一第四頁後三行金杯潄潄曉粧寒按宋詩鈔杯作盤與此異

第四頁後八行已被仙宮聖得知刊本宮訛官據宋詩鈔改

第七頁後五行我乃羈旅人刊本羈旅訛畸於據宋詩改

第八頁前四行天旋地遊日月其根刊本闕月字今補

第九頁前二行芳意竟寂寞刊本寔訛莫據宋詩
改

卷二第十頁後三行百疊烟鬟照眼明刊本照訛
得據宋詩改


卷四第一頁前四行南郭新居按宋詩鈔作南郊
與此異

第四頁後八行牙檣卷畫櫓搖漾刊本畫訛畫據
宋詩改

第五頁後一行樹密正模糊刊本模訛模據宋詩
改

第十頁後一行官下有誰同此况刊本缺况字今
補





總校官庶吉士臣侍朝

校對官編修臣莫瞻菴

膳錄監生臣和其聲